

[Norasmiy tarjima]

**Tashqi Ishlar Vazirligi
Yevroosiyo bo'limi**

**TIV (Tashqi ishlar vaziri)ning Hindiston-O'zbekiston
tadbirkorligini rivojlantirish markazi IT xonasining 2021-yil 15-
iyul kuni soat 14:15 da Toshkentda bo'lib o'tadigan ochilish
marosimidagi nutqi**

O'zbekiston Respublikasi Savdo-sanoat palatasi Raisi Adxam Ikramov Janoblari

Hurmatli O'zbekiston Savdo-sanoat palatasi rasmiylari,

Hurmatli mehmonlar va Andijon hamda Qashqadaryo viloyatlaridan qatnashayotgan barcha onlayn ishtirokchilar,

Bugun IT-xonaning ochilish marosimi hamda Hindiston-O'zbekiston tadbirkorligini rivojlantirish markazining Andijon va Qashqadaryo viloyatlaridagi hududiy filiallari bilan bog'lanish uchun sizning orangizda bo'lishdan juda ham mamnunman. Shuningdek, men O'zbekiston savdo-sanoat palatasiga tashrif buyurganimdan xursandman, zero uning Hindiston va O'zbekiston o'rtasidagi o'sib borayotgan savdo-iqtisodiy sherikligidagi roli muhim bo'lib kelgan.

Sivilizatsiya nuqtai nazaridan, Hindiston va O'zbekiston o'zaro qo'shni davlatlardir. Tarixiy jihatdan, biz savdo, tijorat, madaniy, falsafiy va lingvistik almashinuvlarni amalga oshirib kelganmiz va ular hali ham qadriyatlarimizda aks etmoqda. Bugungi kunda har ikki tomon o'rtasida doimiy tarzda olib borilgan yuqori darajadagi almashinuvlar tufayli ushbu qadimiy rishtalar mustahkamlanib, strategik sheriklikka aylandi. Hatto pandemiya davrida ham ushbu yuqori darajadagi aloqalar bizning rahbarlarimiz - Bosh vazir Modi

va Shavkat Mirziyoyev janobi oliylari o'rtasida 2020-yil dekabr oyida bo'lib o'tgan "Virtual Sammit" bilan davom etdi.

Bugun Hindiston va O'zbekiston o'rtasida biznesga bo'lgan ishonch ortib bormoqda. Hindistonlik sarmoyadorlar O'zbekistonga turli sohalarga, shu jumladan farmatsevtika, sog'liqni saqlash, ta'lim, mehmondo'stlik, qurilish, qishloq xo'jaligi va agrosanoat, to'qimachilik, kimyo sanoati kabi sohalarga tobora ko'proq sarmoya kiritmoqdalar. Mintaqaviy doirada, Andijon va Gujarat o'rtasidagi hamkorlik natijasida bir nechta B2B hamkorlik rejalari paydo bo'ldi. Har ikkala mamlakat Xaryana va Farg'ona o'rtasida shunga o'xshash mintaqaviy hamkorlik modelini ilgari surish bo'yicha ish olib bormoqda.

Do'stlar,

Rivojlanish sohasidagi hamkorlik Hindiston va O'zbekiston o'rtasidagi strategik sheriklikning mustahkam ustunlaridan biri sifatida paydo bo'ldi. Hindiston-O'zbekiston tadbirkorligini rivojlantirish markazi 2018 yilda Toshkentda Hindiston hukumatining moliyaviy ko'magi va Ahmadobod shahridagi Tadbirkorlikni rivojlantirish institutining texnik yordami bilan tashkil etilgan. Markazning doimiy direktori ham shu institut tomonidan yuborilgan. Yodingizda bo'lsa, O'zbekiston hukumati 2018-yilni faol tadbirkorlik yili deb e'lon qilgan edi va ushbu Markazni tashkil etish orqali Hindiston sizning o'sish va rivojlanish yo'lidagi milliy harakatlaringizning bir qismiga aylandi.

Bugun ushbu IT xonasi Hindiston hukumatining doimiy yordami doirasida tashkil etilmoqda. Eng yangi IT-uskunalar markazga O'zbekistonning boshqa viloyatlaridagi tadbirkorlik markazlari bilan darslar, laboratoriyalar, inkubatsiya va virtual aloqalarni tashkil qilishga imkon beradi. Tadbirkorlik markazi iqtidorli o'zbek yoshlariga o'zlarining g'oyalarini tijorat asosida barqarorlashtirish maqsadida o'z biznesini ochish, aqlli biznes g'oyalarini amalga oshirish, innovatsiyalar ekotizimini yaratish,

marketing tarmog'ini moliyalashtirish va rivojlantirish bo'yicha zarur ko'nikmalarni taqdim etadi.

Hindiston-O'zbekiston tadbirkorligini rivojlantirish markazida O'zbekistonning yosh tadbirkorlari, shu jumladan ular orasidagi ayyolar uchun turli xil kurslar tashkil etilayotganidan xursandman. O'zbekiston Respublikasi Prezidenti Shavkat Mirziyoyev Janobi Oliyari ham 2021 yilni O'zbekistonda "Yoshlar yili" deb e'lon qildi va bu yo'nalishda ham tadbirkorlikni rivojlantirish markazi o'z hissasini qo'shmoqda. Yoshlarning malakasini oshirish, ish bilan ta'minlash va biznesni rivojlantirish ushbu markaz faoliyatining muhim natijasidir. Ishonchim komilki, ushbu IT xonasi bu jarayonda yanada yordam beradi.

Hindiston rivojlanish sohasida O'zbekistonning ishonchli sherigidir. Hindiston O'zbekistonga 1 milliard dollarlik imtiyozli kredit taqdim etdi. Ushbu imtiyozli moliyalashtirish doirasida O'zbekistondagi oliy o'quv yurtlarida "aqlli" sinf xonalarini yaratish uchun kompyuter uskunalari o'rnatish bo'yicha qiymati 448 million AQSh dollarilik to'rtta loyiha ham nazarda tutilgan. Ikkala mamlakat Hindistonning moliyaviy ko'magi yordamida jamiyatni rivojlantirish bo'yicha yuqori samarali loyihalar amalga oshirish to'g'risida o'zaro anglashuv memorandumini imzoladi. Ushbu memorandum doirasida qabul qilinadigan turli loyihalar ishlab chiqilmoqda.

Pandemiyadan oldin har yili 170 dan ortiq o'zbekistonlik amaldorlar Hindistondagi "Hindiston Texnik-Iqtisodiy Hamkorlik dasturi" ("ITEC") bo'yicha malaka oshirish va salohiyatni rivojlantirish bo'yicha majburiyatlarimiz doirasida tahsil olishayotgan edi. "ITEC" dasturidan 1993 yildan beri 2400 dan ortiq o'zbekistonlik amaldorlar bank, moliya, loyihalarni ishlab chiqish, menejment, ingliz tilini o'qitish, kosmik texnologiyalar, informatika, sog'liqni saqlash, yoga va boshqa ko'plab sohalarda foydali malakalarga ega bo'lishdi. Har yili o'zbekistonlik talabalarga

Hindistonda bakalavr, magistr va doktorantura bosqichlarida tahsil olish uchun 25 ta grant o'rinlari taqdim etiladi. Hozirga qadar 1000 nafardan ortiq o'zbekistonlik talabalar ushbu stipendiyalardan foydalanganlar. Shuni mamnuniyat bilan ta'kidlaymanki, ko'plab o'zbekistonlik talabalar ushbu stipendiya asosida Hindiston Bombay Texnologiya Instituti hamda Rurki Texnologiya Instituti kabi obro'li ta'lim muassasalarida tahsil olishmoqda. Shuningdek, "ITEC" dasturi kurslari o'zbekistonlik nomzodlar ishtirokida onlayn tarzda ham olib borilmoqda.

Hindistonning dasturiy ta'minot texnologiyalari parklari tomonida tashrif buyurgan hind IT mutaxassisi O'zbekistonda istiqomat qiladi va O'zbekistonda IT-parklarni, shu jumladan birinchi bo'lib 2019-yil iyulda Toshkentda ochilgan, keyinchalik Jizzax va boshqa viloyatlarda tashkil etilgan majmualarni barpo etishda yordam bergan. Hindistonlik yoga o'qituvchisi yaqinda O'zbekistonda yoga mashg'ulotlarini olib borish va targ'ib qilish uchun "O'zbekiston Yoga Federatsiyasi" a'zosiga aylandi. O'zbekistonda Hindistonning salohiyatni oshirish bo'yicha faoliyat doirasi yanada kengayib bormoqda.

Hindistonning rivojlanish sohasidagi hamkorligi hozirgi kunda dunyoning boshqa bir qator davlatlaridan tashqari barcha Markaziy Osiyo mamlakatlariga ham tatbiq etilmoqda. 2020-yil noyabr oyida bo'lib o'tgan Ikkinchi "Hindiston-Markaziy Osiyo muloqoti" davomida Hindiston Markaziy Osiyo mamlakatlariga ijtimoiy-iqtisodiy rivojlanish loyihalari uchun 1 milliard AQSh dollari miqdoridagi kredit taklif qildi.

Do'stlar,

O'zbekiston savdo-sanoat palatasini IT-xonani muvaffaqiyatli tashkil etilganligi va Hindiston-O'zbekiston tadbirkorligini rivojlantirish markazining Andijon va Qashqadaryo kabi viloyatlardagi filiallar bilan aloqa o'rnatganligi uchun yana bir bor muborakbod etaman. Bugungi ishtirokingizdan minnatdorman.

Hindiston-O'zbek tadbirkorligini rivojlantirish markazi faoliyati yanada kengayib, O'zbekistondagi ming-minglab yoshlarga foyda keltirishiga ishonchim komil.

Kattakon rahmat.